

## So vergehn die Plän

Unne om Moo, on de Oolechestell von dene Schiffe, doo iss doch e Informationstafel von de Stadt, unn genau doodevor hott de Schorsch om Sunndaachmoie gestonne, lässt soi Arme errunnerhänge, guckt die Tafel oo unn mecht e gonz traurich Gesicht.

Ich bin vom Domm her kumme, geh zu moim ahle Kumpel unn frooch: Schorsch, was iss, bisde kronk? Odder is dehoom was basiert?

Doo saacht de Schorsch: Doo kumm ich nit mehr hie!

Jetzt wars ich, der e bleed Gesicht gemacht hott: Ei Schorsch, wo kimmsde nit mehr hie?

Nooch Siedamerika. Dess waasde doch, doo wollt ich immer mol hie, nooch Chile unn Argentinie, awwer dess schaff ich nit mehr uff moi alte Daache. Merr hatt halt so soi Plän! Unn er duppt e Tränche aus em Aache, schnippts in de Moo und ruft hinnerher: Schwimm du bis Feierlond!

Ich guck uff die Tafel unn werklich: Wo frieher mol en Stadtplan von Flerschem gehonge hott, iss jetzt de Umriss von Siedamerika ze seh, nit gonz so spitz om unnere End, awwer sunnst gut erkennbar. Was sollen dess? habb ich de Schorsch gefroocht.

Doo moont de Schorsch: Ich denk, weil doch iwverm Moo die Fluchzeuche su niedrig flieche due, könne die Auswärdiche, die hier unne vorbeikumme, aach seh, wo die all herkomme. Ach Honnes, ich wollt doch immer mol onns Kap Horn!

Grad wie ich de Schorsch e bisje tröste wollt, kimmt mett Mordskrach e Fluchzeuch vorbei.

In dem Moment kimmt de Hubert unn sacht: Guten Morgen, die Herrn, was stehet ihr da und schauet zum Himmel hinauf?

Doo saach ich: De Schorsch wär gern emol zu de Gauchos unn zu de Lamas gefahrn.

Ja und? froocht de Hubert unn guckt de Schorsch oo, was hindert dich?

Ach Hubert – awwer wie um mich ze eiern, hawwe se jetzt e Kart von Südamerika hierhiegehenkt. Aach de Honnes hott mem Kopp geschittelt.

Druff de Hubert: Wollt ihr mich verhintern? (So babbelt der!) Das ist doch keine Karte von Südamerika, das war einmal ein Stadtplan von Flörsheim. Ist das nicht eine Schande? Hier am Main, wo so viele Fremde mit dem Fahrrad vorbeifahren, ist der Plan so unleserlich geworden, dass man in der Tat glauben könnte, er stelle Südamerika dar. Das müsste man einmal in der Flörsheimer Zeitung schreiben, dann wird er bestimmt sofort erneuert.

Doo moont de Schorsch: Hubert, dess glaab ich nit. Die dess lese, hawwe nix ze saache; die e bisje was ze saache hawwe, lese dess nit; unn die was ze saache hawwe unn des lese, die saache, mir losse uns nix saache. Unn so ännert sich nix, doo könne mir noch so krätsche. Gehn merr lieber ooner drinke.

Eiern Honnes